



МОНГОЛ УЛСЫН  
ЗАМ, ТЭЭВРИЙН ХӨГЖЛИЙН  
САЙДЫН ТУШААЛ

2019 оны 07 сарын 26 өдөр

Дугаар 253

Улаанбаатар хот

Хуулийн хэрэгжилтийг эрчимжүүлэх тухай

Монгол Улсын Засгийн газрын тухай хуулийн 24 дүгээр зүйлийн 2 дахь хэсэг, Хөдөлмөрийн аюулгүй байдал, эрүүл ахуйн тухай хуулийн 35 дугаар зүйлийн 35.1 дэх хэсгийг тус тус үндэслэн ТУШААХ нь:

1. Хөдөлмөрийн аюулгүй байдал, эрүүл ахуйг хангах ажлын хүрээнд чиг үүрэгт хамаарах дараах үйл ажиллагааг зохион байгуулж, биелэлтийг тооцож, хяналт тавьж ажиллахыг харьяа байгууллагын дарга, удирдлагад үүрэг болгосугай. Үүнд:


1.1. Үйлдвэрлэлийн орчин, барилга байгууламж, тээврийн хэрэгсэл, машин механизм, үндсэн болон суурин тоног төхөөрөмж, өргөх зөөх, тээвэрлэх механизм, даралтат сав, шугам, хоолой, эд анги, ажлын багаж хэрэгсэл зэргийг ашиглах, эзэмшихэд тавих шаардлага, тэдгээрийн техникийн баримт бичгийн хөтлөлт, төлөвлөгөөт засвар үйлчилгээг хугацаанд нь хийж ажилтныг аюулгүй ажиллах нөхцөлийг бүрдүүлсэн байх;

1.2. Эрүүл мэндийн үзлэгт зайлшгүй хамруулах шаардлагатай ажилтныг зохих журмын дагуу үзлэгт хамруулан, үзлэгийн мөрөөр эрүүл мэндийг хамгаалж, хөдөлмөрийн нөхцөлийг сайжруулан, мэргэжлээс шалтгаалсан өвчлөлөөс урьдчилан сэргийлж, ажилтанд учирч болох эрсдлээс хамгаалсан байх;

1.3. Хөдөлмөрийн аюулгүй байдал, эрүүл ахуйн зөвлөл, үйлдвэрлэлийн ослыг судлан бүртгэх комиссын ажлын явц, осолд дөхсөн тохиолдол, үйлдвэрлэлийн осол, хурц хордлогын шалтгаан нөхцөлийг тодруулж, холбогдох арга хэмжээг авч, ажилтнуудын ажил үүргийн хуваарилалт, ажил амралтын дэглэмийг мөрдүүлж, осол зөрчлөөс урьдчилан сэргийлж ажилласан байх;

1.4. Ажилтны ажлын нөхцөл, онцлогт тохирсон ажлын тусгай хувцас, хамгаалах хэрэгслээр ханган, ажилтнуудад бүрэн ашиглуулж, тэдгээрийн хадгалалт, угаалга, цэвэрлэгээ, засвар, ариутгалыг хариуцаж, аюултай, хортой нөхцөлд ажилладаг ажилтныг хүнсний бүтээгдэхүүн, хор саармагжуулах бодисоор хангаж, ажил, үйлчилгээний явцад үүсэх хими, физик, биологийн хүчин зүйл нь ажилтны эрүүл мэндэд сөрөгөөр нөлөөлж байгаа тохиолдолд багасгаж, бууруулсан байх;

1.5. Ажилтныг хөдөлмөрийн аюулгүй байдал, эрүүл ахуйн зохих сургалтад хамруулж, шалгалт авч, "Хөдөлмөрийн аюулгүй ажиллагаа, эрүүл ахуй. Сургалтын зохион байгуулалт. Үндсэн дүрэм" MNS 4969:2000 үндэсний стандартын дагуу аюулгүй ажиллагааны зааварчилгааг ажлын байрны онцлогт тохируулан тогтмол өгч, эрүүл, аюулгүй нөхцөлд ажиллах дадлыг ажилтан бүрт эзэмшүүлсэн байх;



п8 734

1.6. Хөдөлмөрийн аюулгүй байдал, эрүүл ахуйн тухай хуулийн 26 дугаар зүйлийн 26.2-т заасны дагуу хөдөлмөрийн аюулгүй байдал, эрүүл ахуйн зардлыг жил бүр төсөвт тусган зориулалтын дагуу зарцуулж, гүйцэтгэлд хяналт тавих;

1.7. Хөдөлмөрийн аюулгүй байдал, эрүүл ахуйн удирдлага зохион байгуулалтыг боловсронгуй болгож, хууль тогтоомж, дүрэм, журам, стандартыг хэрэгжүүлэх ажлын хүрээнд хийгдсэн үзлэг, хяналт, шалгалтын мөрөөр авсан арга хэмжээ, түүний хэрэгжилтэд хяналт тавьж зөрчил дутагдлыг арилгуулсан байх;

2. Энэхүү тушаалын 1 дэх заалтыг хэрэгжүүлэх ажлын хүрээнд "Хөдөлмөрийн аюулгүй байдал, эрүүл ахуйн гурван /3/ шатны хяналтыг зохион байгуулах журам"-ыг боловсруулан баталж, хэрэгжилтийг хагас жил тутамд Зам, тээврийн салбарын хөдөлмөрийн аюулгүй байдал, эрүүл ахуйн салбар хороонд тайлагнаж байхыг харьяа байгууллагын дарга, удирдлагад үүрэг болгосугай.

3. Тушаалын хэрэгжилтэд хяналт тавьж ажиллахыг Дэд сайд бөгөөд Зам, тээврийн салбарын хөдөлмөрийн аюулгүй байдал, эрүүл ахуйн салбар хорооны дарга /Л.Халтар /-д даалгасугай.

САЙД



Б.ЭНХ-АМГАЛАН

